

CONVOCATORIA PAL PROGRAMA CURTIUMETRAXES DE LLABORAL CINEMATECA 2023

Llaboral Cinemateca abre una convocatoria nueva del Programa de Curtiumetraxes pal añu 2023, una iniciativa de la Viceconsejería de Cultura, Política Llingüística y Deporte del Principáu d'Asturies, al traviés de la Sociedá Pública de Xestión y Promoción Turística y Cultural del Principáu d'Asturies, empobinada a los creadores cinematográficos asturianos o con residencia nel Principáu d'Asturies.

Cola mira de promocionar y distribuyir los curtiumetraxes asturianos a nivel nacional y internacional, va ellaborase un catálogu que recueya una selección de curtiumetraxes asturianos contemporáneos, entendíos éstos como los producidos a partir del 2021, baxo la denominación **LLABORAL CINEMATECA CURTIOS**, que se va unviar a los principales festivales de cine y eventos audiovisuales.

D'equí a poco va facese una xunta nueva del Comité de Selección de los trabayos que van acceder al Programa de Curtiumetraxes de Llaboral Cinemateca 2023, qu'han inscribise primero de les 23:59 hores del domingu 12 de payares del 2023.

REQUISITOS

Van poder concurrir a esta convocatoria les obres que cumplan estos requisitos:

- La fecha de producción ha ser posterior al 1 de xineru del 2023.
- La duración máxima del curtiumetraxe nun pue ser de más de 50 minutos (creitos incluyíos).
- Nes obres ha figurar el títulu y el so(s) autor(es) (o, nel so casu, la entidá participante nella).
- Pue tar rodáu en cualquier formatu.
- El xéneru y el tema son llibres.
- El curtiumetraxe pue tar fechu en cualquier idioma, o nun tener diálogos.
- Los/les autores del curtiumetraxe han cumplir siquer una d'estes condiciones:
 - El director / la directora o productor/a ha tar empadronáu nel Principáu d'Asturies dende polo menos un añu enantes de la fecha de publicación d'esta convocatoria, o ser nació na Comunidá Autónoma o vivir nella de contino polo menos 5 años, o de forma discontinua polo menos 10 años nel pasáu.
 - El/la productor/a o la empresa productora ha tar allugada nel Principáu d'Asturies un mínimu de 6 meses enantes de publicase la convocatoria. Nel casu de coproducciones ente delles empreses, el/la productor/a de la Comunidá Autónoma d'Asturies tien que ser el/la sociu/a mayoritariu/a.

- Los curtios que se presenten nun puen tar yá estrenaos comercialmente. Sí se van llevar a evaluación aquellos curtiumetraxes que s'emitieren o difundieren per televisión, internet y/o cualquier otra plataforma pública o en festivales y muestres de cine.
- Puen presentarse curtiumetraxes que nun tengan la postproducción rematada, siempre y cuando'l conteníu y la duración seyan definitivos. En casu de qu'un proyectu ensin acabar salga escoyíu, los/les autores comprométense a entregalu acabáu nun plazu máximu de 1 mes dende la fecha na que se comunique la selecció.

DOCUMENTACIÓN Y MATERIAL A PRESENTAR

Pa poder concurrir a esta convocatoria, ye menester presentar esti material y documentación:

- Solicitú d'inscripción pa la selecció de LLABORAL CINEMATECA CURTIOS 2023, rellena correctamente y onde s'ha dar consentimientu pa incluyilu nuna base de datos y catálogu de curtiumetraxes asturianos pa la Sociedá de Xestión y Promoción Turística y Cultural del Principáu d'Asturies como ente xestor. Los datos xenerales de les obres tamién se van compartir cola Coordinadora del Curtiumetraxe Español pa la so inclusión nel Archivu del Curtiumetraxe Español. Estos archivos van recoyer namás datos informativos y de contactu, nun van publicar nin link nin contraseña, nin van disponer de nengún derechu sobre les obres, redirixendo cualquier consulta a los/les titulares de los mesmos.

Nesa solicitú va esixise:

- Títulu y duración del curtiumetraxe.
- Un enllaz dixital priváu, cola contraseña correspondiente, pa poder acceder al visionáu de la copia del curtiumetraxe. Esta ha incluyir subtítulos en castellanu en casu de que la obra nun tea fecha nesta llingua.
- Ficha técnica y artística
- Datos de contactu del / de la solicitante.
- Llista de los festivales a los que se presentó'l curtiumetraxe enantes, amás de les selecciones y premios que llevare, si hubiere.
- Declaración de cumplir los requisitos de residencia o ubicación de la productora nel Principáu d'Asturies.
- Biografía y datos de contactu del director/a.
- Dos fotogrames del curtiumetraxe (300 dpi).
- Una fotografía del director /a (300 dpi).
- DNI del / de la solicitante y del director/a, si ye distintu al solicitante.

Los/les responsables del curtiumetraxe han responder de la veracidá de la documentación y datos presentaos, quedando LLABORAL CINEMATECA CURTIOS col derechu a escluir aquellos curtiumetraxes qu'omitieren información. Aquelles solicitúes que nun presenten tola documentación riquío nun se van aceptar.

PLAZU Y FORMA DE PRESENTACIÓN

La inscripción a LLABORAL CINEMATECA CURTIOS va quedar abierta tol añu.

Los trabayos que se reciban hasta'l 12 de payares van valorase pa presentalos a aquellos festivales que tengan zarros d'inscripción o celebración más cercanos cronológicamente, siempre y cuando se reciban, polo menos, 10 trabayos nesta convocatoria; si nun se llegare a esi mínimu van considerase pa evaluación na siguiente reunión de la comisión valoradora, igual que los trabayos que se presenten depués d'esta fecha.

La inscripción ha facese obligatoriamente al traviés del formulariu oficial disponible na web de Laboral Cinemateca www.laboralcinemateca.es

Nun se va almitir la recepción de materiales per corréu postal nin en formatos físicos.

En casu de cualquier dulda o dificultá tocante al unviu de les copias, puen contactar con LLABORAL CINEMATECA CURTIOS na direcció info@laboralcinemateca.es o nel teléfonu 985 18 58 58.

CRITERIOS D'EVALUACIÓN

Pal análisis y evaluación de les solicitúes presentaes, va constituyise un Comité de Selección formáu por cuatro profesionales y espertos/es de la creación, programación y producción de les artes cinematográfiques, que van seleccionar les obres qu'entren a formar parte del catálogu de distribución de LLABORAL CINEMATECA CURTIOS.

Esti Comité va escoyer un máximu d'un proyectu por solicitante atendiendo a estos criterios:

- Calidá artística y técnica del trabayu.
- Orixinalidá de la propuesta.
- Potencial de ser seleccionáu en festivales y muestres nacionales y internacionales.
- Participación acreditada d'equipu técnicu natural del Principáu d'Asturies, residente n'Asturies o vinculáu profesionalmente con Asturias.
- Criterios sociales: paridá d'homes y muyeres nos miembros del equipu, y incorporación al proyectu de polo menos una persona con discapacidá con un grau igual o superior al 33% reconocíu pol organismu competente na materia.

Los resultaos van notificase a tolos participantes per vía electrónica y, igualmente, va mandase una nota de prensa a los medios de comunicación.

COMPROMISOS DE LOS/LES CURTIUMETRAXISTES SELECCIONAOS

Los/les autores de los curtiumetraxes seleccionaos comprométense a entregar, dentro de les feches marcaes pola organización, esti material:

- Una copia del curtiumetraxe con formatu de compresión H.264 (1920x1080; Audio AAC 48.000 Hz; Bit Rate: ente 15.000 y 20.000 kbps), en versión orixinal ensin subtítulos (clean-copy).
- Una copia del curtiumetraxe con formatu de compresión H.264 (1920x1080; Audio AAC 48.000 Hz; Bit Rate: ente 15.000 y 20.000 kbps), en versión orixinal con subtítulos polo menos en inglés (tamién n'español, en casu de que la versión orixinal nun tea nesta llingua).
- Archivu de subtítulos srt o txt con códigu de tiempu n'inglés sincronizaos coles copies en H264.
- Llista de diálogos del curtiu na so llingua orixinal y llista de diálogos polo menos n'inglés (y n'español en casu de que la llingua orixinal nun seya esta), toes con códigos de tiempu.
- Ficha técnica y artística completa.
- Seis imáxenes del curtiumetraxe (resolución mínima 300 ppp).
- Diseñu del cartel del curtiumetraxe.
- Tráiler / fragmentu de curtiumetraxe pa la so promoción.
- Copia de los documentos acreditativos del alta nel epígrafe del IAE y na Seguridá Social de la persona física o la sociedá a la fecha de la presentación de la solicitú.
- Certificación acreditativa de que'l/la solicitante ta al corriente de les sos obligaciones tributaries:
 - Nun ser deudor/a con Hacienda del Estáu.
 - Nun ser deudor/a con Hacienda del Principáu d'Asturies.
- Certificación d'atopase al corriente de les sos obligaciones de Seguridá Social.

DISPOSICIONES FINALES

La selección d'un curtiumetraxe pal programa LLABORAL CINEMATECA CURTIOS implica la presencia n'esclusividá nesti catálogu, nun pudiendo polo tanto tar presente en nengún otru catálogu públicu de difusión de curtiumetraxes. Esta llimitación nun afecta a los catálogos d'empreses privaes.

Los/les responsables de los curtiumetraxes seleccionaos han respetar el calendariu establecíu por LLABORAL CINEMATECA CURTIOS pa l'aportación de materiales.

LLABORAL CINEMATECA CURTIOS acuta pa ella'l derechu a escluir a quien incurra en retrasos qu'afecten a la ellaboración del catálogu.

LLABORAL CINEMATECA CURTIOS va encargase de la inscripción y distribución de los trayayos seleccionaos en festivales cinematográficos nacionales y internacionales y tamién va actuar

como axente de ventes intermediariu de les obres y los posibles ingresos derivaos de premios y ventes van dir enteros pa los/les titulares de les obres.

LLABORAL CINEMATECA CURTIOS va poder organizar proyecciones de los curtiumetraxes del catálogu con fines promocionales en centros culturales, festivales de cine y otros espacios, faciéndolo saber siempre a los/les titulares de les obres.

LLABORAL CINEMATECA CURTIOS va encargase tamién de tolo referente al tráficu de copies y materiales de les obres del so catálogu, desque estos conteníos obren nel so poder.

LLABORAL CINEMATECA CURTIOS va ser l'encargáu de distribuyir a prensa y a otros medios de comunicación cualquier información rellacionada colos curtiumetraxes que formen parte del so catálogu, yá seyan selecciones en festivales, premios o reconocimientos d'otru tipu. Les comunicaciones van ser consensuaes colos/coles directores de los trabayos.

ACEPTACIÓN DE LES BASES

La presentación d'un curtiumetraxe a esta convocatoria supón l'aceptación automática y completa d'estes bases.